

四庫全書

史部

欽定四庫全書

史部  
平定兩金川方畧卷九十八  
至一百

員外郎臣顧宗泰覆勘

總校官原任侍講臣王燕緒

欽定四庫全書

平定兩金川方略卷九十八

六月庚子

上諭軍機大臣曰明亮現在帶兵赴正地進攻昨據奏

六月初一日已抵吉地此一帶後路多與金川賊境

相通賊皆得潛出獲截前此投出番人供詞又有賊

懼官兵由正地進攻之語賊人狡惡異常安知非詭

計揚言誘明亮深入賊乃從旁抄出以斷我兵歸路

於事甚有關係設或稍有疎虞不特此路行兵阻碍  
並恐全局因而牽動軍心不免生餒深為未便是以  
朕於此路時刻係念實因此路非阿桂軍營之谷噶  
一帶及明亮原營之馬尼一帶可比况此路不須乘  
間出奇之用與阿桂直攻勒烏圍者不同今阿桂處  
兵力較盛惟在覓路進攻又係從上壓下自可望其  
得手朕亦惟于阿桂一處踰盼捷音其明亮一路本  
非正兵原不冀其必能集事而防範則不可不周富

德等務於明亮進兵後路不時遣人探聽俾得消息  
常通密為籌備

癸卯舒泰奏言六月初一日綽斯甲布土兵入林  
樵採有賊四五十人從內突出適遇放哨官兵放  
鎗攻壓賊番被傷潰散至本月初四日巳時外委  
李連元等隱見達爾圖山梁西邊箐林內有漢兵  
五六十人自上而下料是賊人改裝搶掠即與放  
鎗接仗各處伏兵齊起賊人隨即奔散又有三四

賊由了口欲來接應臣即用礮轟擊遙望見賊入中礮落溝甚衆官兵乘勝追殺至碉卡極近山勢極陡處始行撤回此次殺賊八九名其餘帶傷者甚衆

同日阿桂豐昇額色布騰巴爾珠爾奏言臣等於前所掣礮臺之外茲又連掣木柵二座距賊僅有一箭之地晝夜轟催賊碉上截已漸次摧殘為計二三日即可奮力搶撲近日前敵不時有賊番叫

喚用礮屢經擊斃而賊番叫喚愈急據稱僧格桑  
已經身死或將屍首擡來或差人前去驗看等語  
臣等令土兵高毅斥詈以僧格桑罪大惡極金川  
敢於應留即應將索諾木一同勦滅前次稱將格  
格桑擒獻尚且不受今已就死更何值差人委驗  
况僧格桑雖死索諾木自應代伊受縛以昭顯戮  
賊衆聞之皆股栗奔竄而去竊思僧格桑之死雖  
未可信但前據脫出番人已有僧格桑染病之語

如果已受冥誅則竄入之小金川番人自必心生  
離叛而僧格桑雖死大兵又復四面奮擊賊知

天朝務欲將金川埽殄自必益加震動均奏入

上諭軍機大臣曰舒常奏達爾圖山梁了口見有漢兵  
五六十人官兵料是賊人改裝希圖搶掠放鎗迎擊  
賊人逃竄等語賊番竟敢改裝前出甚為可惡但賊  
番雖甚狡惡從未聞其能如此詭計此必叛逃從賊  
之張坤忠所教實堪切齒其人非但不可輕宥并不



當僅以誅磔完事大功告成時務將張坤忠挈獲派員嚴密管押檻車解京備具嚴刑盡法處治方足以雪憤恨至賊既能施此狡獪伎倆恐設計引誘官兵亦所不免各將軍叅贊等均當一體留心防備又阿桂奏近日賊人稱僧格桑已經身死或將屍身擡來或打發認識人去驗看等語阿桂等斥詈之語詞義雖覺嚴正究於賊人奸詐底裏未曾揭破不能使之畏懾竟當令土兵向衆賊云爾等前用木籠擡獻僧

格桑時將軍等以兩賊首方狼狽為奸豈肯無端擒獻必係賊匪詭詐斷不可信因其時既不受爾所獻之囚亦不值向爾鼠輩講論今賊首見前計未售復為此計則爾等鬼域肺腸更加顯然豈能為爾所惑爾等可回告賊首以索諾木兄弟負恩犯法罪大惡極為覆載所不容必須勦滅殲誅為眾良善土司除害今天兵壓境賊巢破在旦夕若眾番明于順逆即將索諾木莎羅奔兄弟及助惡之頭人等縛獻軍門

尚可貸爾番衆之罪若僅以僧格桑搪塞無論其死活  
與存亡皆所不問亦斷所不受又安肯派人赴賊巢  
驗看其真假乎土兵等傳語斥詈訖即可面用鎗礮  
轟擊並令官兵等共知此意使不為浮言所惑至向  
來自賊中脫出官兵止供稱被賊掠去收於地窖從  
未言及賊人問及軍營虛實情形若何此即綠營惡  
習恐以漏洩軍情獲罪故爾諱匿不言而將軍等亦  
從未以此訊供未免踈漏想來賊人不時掠我兵丁

自係欲探內地消息况賊番向與內地交易能說漢語者自不乏人豈有不向其詳訊軍營之理著傳諭將軍等所有節次脫出之綠旗兵丁若尚留營充伍即令將軍叅贊等就近隔別研訊其已遣歸原營者即令文綬提至省城研訊問其被賊拘執時詢以何語務令確實供明勿使絲毫隱飾

同日阿桂豐昇額色布騰巴爾珠爾等奏言駐劄丹壩總兵五福同副將李天佑於六月初三日駕

馭丹壩土舍頭人派兵一百四十名即於是夜進  
攻穆爾津岡賊碉至初四日丑刻砍開碉門拋放  
火彈內賊六名均經殺斃隨將戰碉放火焚燒其  
山梁碉卡賊人齊來救援各兵又奮勇上前接仗  
斃賊甚多查丹壩兵丁為數無多原不足以資深  
入但屢次殺賊殺碉亦可以寒其膽而分其勢臣  
等又密諭以初十日前後各路官兵約齊併力進  
攻該鎮等鼓勵土兵屆期搶殺自必更能得手奏

入

上嘉之

同日阿桂豐昇額色布騰巴爾珠爾又奏言查小金川番人於所獲糧食俱擇隱僻而所埋不過數斗零星分貯非其親自掘藏者即不能知其習俗然也臣等從前亦令土兵各處察看如有窖藏之跡即行控劄然並無所獲惟是小金川地方其山坡平坦之處去歲番人零星種有秋麥現已揚花

吐穗雖為數無多亦不可任其出而偷割查鄂克  
什別斯滿等處番人素皆貧窘得此尚足以裨生  
計現今鄂克什土司策塔爾及管理別斯滿之侍  
衛穆塔爾等帶領土婦弱稚收割並酌派土兵於  
收穫之處預行埋伏如有賊番潛來搶劫即行痛  
加殲戮奏入

上嘉之

同日阿桂豐昇額色布騰巴爾珠爾又奏言斯第

胡土克圖之徒弟噶爾瑪噶卜什率其徒衆於本月初七日來抵西路軍營查喇嘛等雖非黃教然看其光景頗有修持據噶爾瑪噶什呈出伊斯第胡土克圖所留番稟上有灌頂圓通妙法國法之印臣等當令通事譯出係陳其年老患病不能出力並述從前轉世及得受前代印信緣由懇求照舊作興之意臣等遵旨諭以汝等誠心出力



大皇帝深為嘉獎俟大功告歲汝等所請廟名印信自應即為具

奏喇嘛等甚為感悅而軍營各土兵見之無不至誠  
皈依共謂金川即當殄滅奏入報

聞

同日

上諭軍機大臣曰現在阿桂等分路進剿而阿桂一路尤為得力自可尅期深入若官兵攻至勒烏圍時賊

衆必更并力守拒攻擊尤為緊要而制勝之道自  
必用礮轟摧但賊人礮卡石牆甚衆礮力未必即  
能擊透因思昔年曾以衝天礮擊賊即俗所稱西  
瓜礮者用之頗為得力若施放有準礮子墜入礮  
中隨藥烘發礮內之賊無難一礮而斃較之拋擲  
火彈豈不勝至百倍現在派出乾清門侍衛阿彌  
達令其馳驛送至軍營但必須試演定準解往方  
能得濟阿彌達自熱河起身到京尚需兩三日著

傳諭舒赫德英廉即將所有西瓜礮取出試看並  
於造辦處選派諳習機緘之人於欽天監選派精  
於測量之人同至演礮處所約計賊礮高寬丈尺  
紮縛木架或就山岡處立架使有高下形勢比平  
地筭演更準如演放數礮視其礮子俱能正墜礮  
架之中藥線遲速俱能合法則用之自必有效可  
將派出之造辦處欽天監人員辦給應得分例俟  
阿彌達到京即令帶領由駟前往其解礮應用之物

毋稍稽悞再衝天礮體重自三百斤至三百八十斤不等恐進棧以後人夫連送稍覺費力此礮銅鈇皆可鑄現在軍營鑄礮銅鈇源源運往鑪匠俱可供用止須按礮式大小製就木樣令諳習成造施放之人賫帶應用之螺旋藥線及礮子烘藥等項同往軍營就近成鑄配用則行程既速應用尤為利便至其四輪礮車更可至彼成造祇須按其程式問明尺寸作為小樣帶往更覺省事均著舒赫德英廉預為辦妥

俟阿彌達到京後即令起程至所需鑄礮銅鉄必須  
煉淨方為有益若阿桂於接奉此旨後將銅鉄預煉  
備用則所派人員一到軍營即可供鑄尤為迅捷並  
有賞給阿桂豐昇額色布騰巴爾珠爾大小荷包各  
一對亦令阿彌達賞往

甲辰明亮奏言初八日自甲魯統兵過河前抵正  
地山口據前所遣去探路之頭人先後回營稟稱  
自黃草坪直下深溝去正地寨落相隔五十餘里

兩山相夾層層迴護此內樹林深黑探進有二十餘里亦並未遇賊人踪影兩旁多有來路其甲爾壑壩一路從綽斯甲布土兵所佔碉卡進去過兩重山即為斯喀爾地方金川於兩山左右連築九碉互為聲勢中間了口復立木城一座攔住去路若向上攻奪兩旁鎗石並下無可躲避等語再四研詰衆口僉同均多難色臣等再四思維自吉地進來自西而東復自南而北沿途所經右首一帶

山梁為格爾格堡為迪達為格爾頂為珠爾德為  
格楞皆與賊人馬爾邦駱駝溝正地相近左首一帶  
山梁為結瑪羅多層巒疊嶂高下連接山後即通  
丹東大道賊自甲爾壑壩偷越過山到處皆可抄  
出且兩山箐林遮道非窮搜可盡但使數賊潛伏  
其間略施夾壩即足搖動軍心計目下所帶官兵  
僅有七千餘人而此一路山梁左右均與賊番交  
界自格爾格堡以至甲魯已共需駐兵二千餘名

留打仗並黃草坪安營設卡只有五千餘名不但斯喀爾一路固難力取即由正地之黃草坪循溝直進而穿林越箐必須步步聯營而下現兵實不敷分撥况賊番早經知覺宜有准備乃遣人偵探寂無影響欲求一接仗而不可得其為設伏于險誘我前往以圖邀截更無疑義少一冒昧所關於國體甚大臣熟籌寧蹈愆期之罪不為輕試之謀但大兵既已到來又豈可進退無據隨即發兵將黃



草坪先行佔住以絕賊人肆出滋擾之路並於正地山口進去三十餘里甲斯柔地方移營駐劄聯絡聲勢一面親赴各處瞭望別商進取奏入

上諭軍機大臣曰明亮奏差人探聽黃草坪至正地一路箐林深黑進至二十餘里並未見賊踪影其甲爾壑壩一路過兩重山即為斯喀爾賊于兩山左右連築九碉中間復立木城一座擋住到處皆可抄出自不宜孟浪貽悞等語所奏甚是正地一路原為攻其

無備之舉並非必籍此路成事且從賊巢投出番人  
有賊人恐官兵由正地獨松一路進攻即抵擋不住  
之供上年並未聞有此語必係賊番知有正地進兵  
信息預為準備設伏因即將計就計揚言相誘以冀  
墮其術中朕早已見及於此是以屢諭明亮令其進  
兵時加意慎重今明亮此奏果如朕所料自斷不可  
冒昧輕進明亮既從吉地起程賊人諒必果有知覺  
何至數十里中毫無準備其為設伏誘我愈無可疑

蓋賊見阿桂一路難以動搖即明亮絨布一路亦無  
懈可伺故欲借正地一路誘我吃虧今賊之底裏業  
已盡皆窺破斷不可冒險而進明亮此時竟當帶兵  
回至絨布大營相機另籌攻勦並當通諭圍營將士  
以分兵進攻正地原欲出賊人不意為乘虛抵隙之  
用今賊人乃敢設計誑誘豈肯為其所愚又豈可置  
兵於無用之地定以撤回大營為是如此曉諭軍營  
共相傳布賊衆諒必聞知見其計不行亦足沮其心

而奪其氣

同日

上諭軍機大臣曰現已有旨令明亮撤兵仍回絨布寨  
大營明亮接奉諭旨自即遵辦但絨布寨駐兵已久  
庚額特一路既不能急切進攻而斯第博堵一帶又  
難再往若僅為牽綴賊之用富德一切勝任明亮設  
復回兵株守殊為非計因思當噶爾拉一路賊此時  
守禦自必空虛其地又係明亮熟路而距絨布又不

甚遠明亮或于回兵時揚言撤赴絨布而過程潛趨  
當噶爾拉或能攻其無備竟可得手設或僧格宗一  
帶尚需留兵應援即於七千兵內酌留亦尚敷用明  
亮可密籌妥辦奏聞或并以此密札阿桂其餘各路  
軍營將軍大臣皆可不令預聞至所需糧餉先行畧  
帶前往俟到彼再行密籌接濟亦可不致有悞再阿  
桂一路如已進抵勒烏圍攻勦自非易事或令明亮  
帶所有之七千兵由僧格桑美諾大板昭一帶經赴

阿桂軍營合兵攻勦二將軍并為一路力量聲勢更大又或到彼有可相機分勦之處亦為便利著密諭阿桂悉心籌度或令明亮帶兵徑赴阿桂軍營或令明亮先至當噶爾拉襲攻阿桂可即詳細熟籌密速具奏

同日富勒渾郝碩奏言文綬咨送摺稿借動成都所屬社倉穀六萬石碾米由灌汶一路滾運西北兩路軍營又于嘉眉二屬動碾常平監穀四萬石運

交雅州轉運打箭爐以資接濟自是通融合辦之法但查西路及凱立葉官兵並沿途夫役合計每日需米五十餘石現在尚有前派未運米三萬餘石又軍營各站存米一萬餘石共有四萬餘石以每日五百石核筭可供三月之糧此時新派之六萬石若復一時趕運不特陳陳相因且恐夫價米乘勢居奇臣等商酌此項米石自以仍照昔定章程總以每日百石為率按月次第轉輸較為妥協

且正當青黃不接之時所有前派未運之米與其  
重價購買莫若即先將此項社穀碾動赴運俟秋  
收時再買補以足社穀之數按月運供如此一轉  
移間則米石不能昂貴腳價亦歸節省其南北兩  
路情形亦俱應照此辦理奏入

上嘉之

丁未阿桂豐昇額色布騰巴爾珠爾奏言查羅博  
瓦山岡下賊人據守之地名色湖普山梁中間連



設三礮又于其右邊塹下築一大礮左邊塹下築  
兩礮與中間三礮互為援應其六礮前後兩旁樹  
林蒙密官兵穿林前進必須偃俛而行兼之雨雪  
數旬賊將各礮柵收拾益堅且由羅博瓦山岡前  
抵木城石礮自上而下陡峭異常官兵不能攻取  
則退撤甚難亦不可以決策以期必得臣等派出  
分為三路於十二日月黑之夜即令各兵分隊而  
下不但並無人聲並不許火燭露有火光各兵潛

往埋伏等候賊人尚無知覺其喇穆喇穆各碉前  
此運礮轟摧亦稍塌損并令普爾普保寧海祿同  
時帶兵攻撲使色湖普各碉之賊前來救援更可  
以分其力而喇穆喇穆之右山腿並令總兵成德  
特成額等為進取之狀以綴賊勢普爾普等率兵  
直上連搶兩大石卡賊人合力憑碉抗拒鎔石如  
雨海蘭察等三隊之兵直抵碉根將第一碉圍住  
察看賊碉上截雖經大礮摧殘而其下截因橫堆

木植以為抵禦尚無傷損但賊礮鎗眼既為木植所遮賊鎗無從施放官兵轉藉所堆木植以為遮蔽使賊鎗石不能及之上撬挖礮牆拋入火彈賊見官兵四面合攻竄逃無路尚復悉力固守臣等先派吉林索林等兵埋伏而令官兵畧開一路賊果從伏兵中間竄出各兵儘力攢射殪斃之外其餘無不負箭而逃官兵既克第一礮進圍第二三礮賊人尚復抵死抗拒鎗石甚緊而官兵勇氣倍加騰上礮頂攻破礮門

痛加殲戮第二三碉立時全克其額森特所攻左邊兩碉及烏什哈達等所攻右邊一碉亦皆先後攻取賊番殲斃殆盡並將附近平寨一併奪取惟查色溯晉之前山勢迤邐向下又分為兩支向南一支上有賊碉二座向西一支係直下遜克爾宗之地工有碉座二處均甚堅固必得此處始可順山直出箐林下至有民寨莊田之所地形稍敞則左右中三路皆可進攻遜克爾宗碉寨官兵是日

又將西向山腿一礮搶獲而敗退之賊及接應之賊於所克礮座前相離里許山峯突起處之第二石礮內竭力死守十三日早復攻西南兩面山梁之礮自辰迄午進撲數次將向南山上之第一賊礮又經克獲其二礮及向西峯巒突起之礮因林箐深堅礮堅路險一時未能克取查此處山梁雖逐步漸下而峯巒如脊兩旁盡屬陡崖其陰陽兩面均箐林深密官兵若從兩旁抄上則須偃俛而

行難於施展若從中道直進則正對堅礮鎗石齊  
下督兵攻撲勢必多致損傷臣等現擘木柵數座  
直逼賊礮運礮轟摧稍有塌毀即可撲攻一得此  
處地面稍寬則進抵遜克爾宗似易為力至此  
共計攻獲戰礮十一座平礮四十餘間獲賊六名  
殺賊二百餘名割取首級三十九顆並殲斃帶兵  
大頭人達實策旺及巴古布里寨頭人巴克多綽  
窩思達爾結二名所獲礮位火藥鉛丸及烏鎗丸

矛口糧甚多此次官兵於攢集堅碕之處竭力撲擊自不免於傷損然尚不至甚大其內委署章京德海受傷較重副將烏爾納遊擊羅江鱗守備果關五達色得石鎗石等傷俱輕副章京索柱委署章京福勒奮不顧身以致陣亡殊為可惜奏入

上諭內閣曰阿桂等奏攻克色湖普木城石碕並殲斃帶兵大頭人等一摺覽奏深為欣悅此次將軍等督率有方各將領弁兵於山崖險仄之地均能勇銳直

前頃刻之間克獲堅碉數十殲戮賊衆多人甚屬可嘉所有將軍叅贊及摺內帶兵各員即著交部議叙其在事出力之將弁兵丁查明咨部議叙用獎勞績

同日

上又諭內閣曰阿桂等於色溯普山梁克獲碉卡殲戮賊衆已有旨交部議叙矣此次官兵於攢集堅碉之處奮勇力攻自不免間有損傷雖為數無多亦堪憫惜所有陣亡之副章京索柱委署章京福勒及得受



鎗傷較重之委署章京德海受鎗石傷較重之副將烏爾納遊擊羅江麟守備果闕五達色俱著交部分別從優恤賞此外如有陣亡受傷者漢土弁兵並著阿桂查明分別報部辦理

同日

上又諭軍機大臣曰阿桂等奏派兵攻取色湖普山梁殲戮多賊大小碉卡全行克獲將軍等調度有方領隊大臣以及官兵人等不避艱險奮勇前驅洵屬出

力朕嘉悅之極更不禁惻然憫惜除已降旨交部議  
叙外阿桂豐昇額色布騰巴爾珠爾著將朕所御用  
燧囊賞給海蘭察普爾普額森特烏什哈達福康安  
成德等亦各賞上用燧囊一件以示優異官兵內有  
奮勉打仗應行賞給巴圖魯名號者即行查明具奏  
此次所殺大頭人達寶策旺從前未經奏入著阿桂  
查明具奏

辛亥明亮奏言竊思正路一地險阻異常再四查

探別無機會可乘臣與奎林三保和隆武舒景安  
教成及其餘領隊大臣公同商酌其馬柰一路河  
北阻於庚額特河南阻於斯第皆非可力期必克  
而以言牽綴則已有富德毋庸臣添兵前往其功  
噶爾拉等處上年以數萬餘兵尚難深入此時現  
兵不過七千餘人該處山形扼塞用兵亦無把握  
惟阿桂谷噶一路最有可進之機而攻打逾時尚  
為陰雨所阻賊人探知各路俱為牽綴則將並力

聚克於此遂致不能奏功旦夕查凱立葉一路先  
經五岱帶兵丁據守究以兵數無多為賊人窺破

現奉

諭旨派豐昇額帶領新到滇兵三千徑赴凱立葉攻打  
第念阿桂現於遜克爾宗喇穆喇穆兩處一齊攻  
打則滇兵三千諒更難挿為豐昇額之用今臣自  
甲斯柔前赴木池僅有兩日程途而自木池前至  
凱立葉由周叟從噶克卓克采一路而去共一十

五站計程不過十一二日可到若以臣所統現兵  
移赴凱立葉協同五岱進勦則此一路已合兵數  
萬足與阿桂互相應援若阿桂一路得手需兵接  
續亦甚捷便况所需糧運又非另起爐竈而於後  
路多添一項兵力搜捕餘孽更見肅清臣等徃復  
熟籌若具摺陳請再行起程未免虛糜三日不揣  
冒昧一面札會李世傑等停止糧運營中所餘米  
石用為裹帶其火藥軍裝即令運回章谷存貯俟

辦理停妥臣即於三四日內統兵就道其原在馬  
柰出征之革布什咱明正布拉克底巴旺各土兵  
共一千五十名令其仍赴馬柰軍營其餘各項兵  
丁俱隨赴凱立葉進勦惟大兵既撤以後自甲魯  
以至吉地其間一百五十餘里皆係荒山密箐惟  
吉地丹東點資溝三處為革布什咱全境扼要隘  
口擬將甲魯一帶原安漢土官兵並前在革布什  
咱各處舊有官兵分派將領立營防範以專責成

奏入

上諭軍機大臣曰明亮奏正地一路實無可進之機擬  
由周叟從噶克卓克采一路移赴凱立葉協同五岱  
進攻等語覽之深為欣慰不意明亮竟能出息若此  
前因明亮奏到吉地後即派人細探路徑據稱斯喀  
爾山梁列有九礮仰攻費力而黃草坪一帶山梁林  
深箐密數十里內不見賊踪恐賊人設伏計誘斷不  
可冒昧輕進因諭令明亮撤兵由大板昭一帶赴阿

桂軍營協同進勦今明亮于未奉朕旨之前所奏與朕意適相脗合且朕令由大板昭一路程站尚遠而明亮所奏由周叟經卓克采至凱立葉一路僅須十一二日之程較朕旨更為迅速朕前日之旨於二十日發往計明亮於初三四日方能奉到今明亮已於二十二日起身初三四即可到凱立葉較之得朕旨而行又早半月餘似此機緣湊巧明亮益當努力為之明亮著賞御用玉韉一枚燧囊一件奎林三保



至西路運糧前據富勒渾奏計運到者一萬三千餘石敷軍營一月之用今添明亮兵七千每十日約需米五百餘石富勒渾即當一併籌添俾軍食源源接濟明亮到後或即由凱立葉攻進或阿桂已抵勒烏圍即往會勦之處均著迅速具奏

平定兩金川方畧卷九十八

欽定四庫全書

平定兩金川方略卷九十九

七月癸丑舒常奏言臣于六月初九日接准阿桂

來札密訂於十二十三兩日各路大兵會同進攻

臣一面飭派舍衛格羅斯喀爾兩路之侍衛進財

保副將常泰叅將常保守備饒祥等令其如期潛

進一面密札永平等選派日旁官兵亦如期協攻

又于宜喜各營派兵一千一百餘名分為五隊分

攻達爾圖山梁西邊各碉其東邊二碉派遊擊李天貴等帶土兵六百名攻取十二日丑時按隊潛進暫伏箐林俟月落後向上攀登擊賊不備及官兵出林賊人知覺拋石迎拒官兵放鎗攻擊賊衆在碉卡間抵死拒守天明望見碉外隔溝抵拒之賊屢被鎗箭擊斃而副將董果一路直至賊濠拋擲火彈盡力攻擊乃木城外又有番賊救援我兵即用排鎗擊斃十餘賊餘俱遁入碉內溝濠深廣

難以越過而董果衆神保五十三俱受鎗傷其勢不能立取隨令撤兵臣思此次攻擊賊已受創乘此各路並舉次日添兵撲攻或能克取復調覺木交泥峙岡等處防兵并令頭人溫布多派土兵即於十三日乘月黑潛進將近礮卡天已漸明官兵即均奮力上前登撲直抵濠邊橫欄設法越過賊人危急抵禦更密並見甲索山梁有五六隊賊人前來接應臣于林內已先伏兵俟賊將近即施放

排鎗打傷二三十人餘俱奔入碉卡隨亦將兵收  
撤

同日舒常又奏言

臣

據進財保常泰常保等稱十

三日戌刻進攻舍衛格羅因賊設有石卡三座漢  
土官兵即分三路潛登直至山頂賊始知覺鎗石  
並發道路險窄官兵不能一齊上撲因派兵繞至  
賊卡之後前後夾攻賊不能支奔入二卡官兵仍  
復夾攻當已連次克取共約殲賊四十餘人現今

土兵分守三卡官兵于山口扎營接應等語臣即  
于宜喜各營又撥漢土兵一千名令叅領全保遊  
擊李天貴等帶領前往助守三卡一面札知明亮  
如大兵可由此進明亮即分兵攻勦如其此路難  
進則官兵守此亦為無用應飭令回營另籌辦理  
又據派赴斯喀爾之守備饒祥回稱官兵更番攻  
打賊人恃其地險碣堅總難得手此路情形大約  
戰守皆非所宜是斯喀爾一處亦難以供大兵前

進其舍衛格羅可否進兵俟明亮議覆至日別為

妥辦奏入

上諭軍機大臣曰舒常此次進兵原因阿桂知會各路  
並進是以由達爾圖山梁分兵前往但其地屬險隘  
官兵即奮勇設法終不免限于地勢雖經斃賊數十  
而官兵傷損過多恐綠營屯土各兵見之不無氣餒  
於事轉屬無益况達爾圖宜喜一帶亦已經屢試難進  
止可為牽綴賊勢之用不宜復籌襲擊舒常等此時



只宜嚴守營卡勿使賊衆潛出窺伺搶刼以待乘機  
策應轉不必冒險輕進致有挫損

臣等謹案達爾圖山梁地形險隘堅礮林立舒  
常駐彼牽綴屢次攻擊未經得手我

皇上慮其冒險撲礮無益進取

諭令嚴守營卡以待乘機策應知難見可慮出萬全迨  
後明亮道經木池因綽斯甲布懇請留兵協勦  
伺隙前進即

奏明會同舒常將達爾圖及俄坡各碉奮迅克獲

與<sub>臣</sub>阿桂等隔河並進迅擣賊巢益欽

神幾豫燭凡戰守竅要移步換形先後遲速之間無一

不如示諸掌也

同日

上又諭內閣曰進財保著加恩陞授三等侍衛常泰常

保著加賞緞匹遇有應陞之缺酌量陞補

同日旺保祿王進泰奏言<sub>臣</sub>等奉

旨令將後路應撤應歸各卡隘遵照將軍阿桂所籌辦  
理五月十一日准桂林札稱所有南路科多等處  
應移往河南之兵已令鎮臣教成帶領于十五日  
到美諾臣等即將西路博羅克所駐官兵一併撤  
回美諾並派兵前往將山路趕修完竣十九日臣  
同教成帶領西南兩路撤出官兵二百餘名前住  
河南兩路適中之塔克撒山梁安設卡隘並因塔  
克撒地方緊要將美諾以後之阿爾圖沙木拉爾

資薩木喀爾底等處裁兵一百名添入並將破碉  
撤回之兵一百名又于美諾抽兵一百名共合兵  
二百名令叅將特靈額帶領安設于河南舍隆為  
塔克撒薩穆果穆橋兩路接應其撤出默資溝日  
古嚕溝兵二百名往塔克撒以南安設卡隘臣等  
回至美諾將由博羅克山梁撤回兵二百名添設  
於思巴寨山梁卡隘以資固守再臣等查翁固達  
山梁所安之格思底一卡原因與帛噶爾角克碉

及破碉接聯哨巡而設今兩處官兵已經裁撤則  
格思底一卡似應歸併喇布寨卡內合兵二百與  
翁固達新舊兩卡聯絡更為得勢至大壩溝口為  
由功噶爾拉崇德乾海子一路至美諾之要口所  
有原派防兵一百二十名應請仍舊留駐又准提  
臣常青咨稱該處札達山梁已將木波之兵撤過  
河東派撥駐扎與兜烏接續又派都司白文常帶  
兵二百名前駐扎應轉飭兜烏防兵與達札防兵

會議適中之地逐日會哨臣等查兜烏山至達札山相距一百餘里甚屬寫遠逐日往來會哨殊為未便應將巴木通帛噶爾角克碉撤回兵三百名內除安設兜烏山梁一百名外其餘安於小兜烏會哨方能接應且就近登高瞭望河西之帛噶爾角克碉一帶更為周密亦經會商常青意見相同即派副將溫有哲等領兵二百名往小兜烏山安設又派弁兵一百名在兜烏山梁駐扎均已報明

將軍遵辦今據移駐塔克撒舍隆並兜烏山梁及  
小兜烏山等處將弁稱各該處卡隘俱已修整完  
備臣等親往查驗卡牆高厚濠溝深濶均屬堅固  
妥協且俱近有水泉並飭其逐日派撥弁兵與上  
下卡隘會哨一切公文差務南路改由河南塔克  
撒一帶行走西路改由河東別斯滿鄂克什一帶  
行走均應小心遞送夜則支更守望以防竊盜臣  
等仍不時親往閱查或委員潛往稽察計自五月

以來並無夾壩滋事奏入報

聞

甲寅阿桂豐昇額色布騰巴爾珠爾奏言查色湖  
普前向西山腿賊碉係在一線山嶺之上石碉本  
為堅固而山峯如脊兩面箐林叢密尤未易逕行  
搶撲是以<sub>臣</sub>等接孛木柵前逼賊碉並即運礮轟  
摧三四日間頗有坍塌<sub>臣</sub>等於十八日夜派海蘭  
察額森特分帶官兵前進又令烏什哈達成德普



爾普等分路進攻以綴賊勢於十九日丑刻分隊  
並發各官因上次已獲大勝亦人人奮勇爭先直  
前攻擊賊於碉內施鎗擲石又復潛藏壕內往上  
擊打兩處皆係箐林或隱身樹上或匿大石隙間  
悉力抗拒官兵分頭勦殺斃賊甚多而四面皆有  
賊鎗官兵無可遮護自寅至巳恐至多傷因將官  
兵漸撤其烏什哈達等所攻向南山腿之碉亦將  
木柵攻開而碉外尚有深壕正欲將所帶梯板乘

墊過壕而西面有賊百餘接應背後林立亦有賊來應援官兵鎗箭齊發傷斃頗多賊衆旋即敗回碉內抵死拒守其普爾普等攻打喇穆喇穆北面之兵潛上山梁直攻賊卡並擲火彈焚燒賊人驚亂棄卡竄入上面高碉併力固守官兵見賊人聚集乘間放礮賊人多被擊死至成德等攻打喇穆喇穆東面之碉賊衆從深林兩邊抄出欲截官兵之後成德等分兵迅擊斃賊十餘名餘多被傷敗

遁而去此三處官兵因前路已撤亦俱徐徐退下  
此次打仗巴圖魯叅領興奎守備巴綉阿得有鎗  
傷其餘弁兵內陣亡受傷者統俟查明報部查大  
兵一得避克爾宗循格魯瓦覺溝而下即可直抵  
賊巢是以攢集醜類併力於此守禦而喇穆喇穆  
之賊察看已經稍減臣等擬一面攻打色湖普向  
西之碉一面分路潛上直取喇穆喇穆中間之碉  
不論何處得利均可順山攻壓

同日阿桂豐昇額色布騰巴爾珠爾又奏言本月十六日有小金川番人雍中噶勒丹彭木爾結並番女得爾章從金川投出臣等詢稱前日大兵攻擊殺死大頭人達實策旺百姓死傷甚多聞說若再失去色湖普連喇穆喇穆凱立葉俱難保守現在帶兵大頭人是布籠普阿納木山塔爾薩木坦納幹策楞三人其賊衆已經逃散者均已追回同守又聞欲集各處番人來斷官兵後路而此時各

寨並無男人其老幼婦女甚是慌亂兩金川人互相偷竊並偷及土司糧食至僧格桑從前原思送出土司頭人恐其送去即將金川指噉之處告訴天朝且聞移塔爾現在官兵營盤若代僧格桑求恩赦罪渠帶小金川人前來助戰或并將逃在金川之小金川番人招之出去必至即行潰亂因將毒藥醜之俟其將死送出及送出時大兵不收僧格桑亦死土司又差頭人達爾什阿桑山塔爾薩木坦

等將屍交出大兵不收即埋在遜克爾宗河岸此  
時小金川番人見僧格桑已死均思逃出土司聽  
知撥到宜喜一帶守卡將來大兵進去定要來降  
等語查賊人只有此數今自進勦以來即就谷噶  
一路屢次殲斃已多加以大兵四面環攻其左支  
右詘不敷拒守勢所必然即悉其賊衆前來滋擾  
而官兵後路無處不刻刻嚴防轉可趁機痛勦且  
賊酋既欲將僧格桑呈獻免罪又慮其出而首告

商謀用毒俟將死時始行獻出其殘忍險惡實與  
蛇蝎無殊現雖捨死抵拒而官兵佔據得勢止須  
破此一重要隘賊酋等斷不能久延殘喘至投出  
番人內其雍中木爾結番女得爾章眷屬尚在噶  
勒丹彭係番人奴隸隻身並無親屬當另為安插  
均奏入

上諭軍機大臣曰阿桂等奏攻碉殺賊並籌辦進取各情  
形此次雖未得攻碉卡而官兵等奮力攻打斃賊頗

多亦足令賊人喪膽當此吃緊關鍵攻取不宜稍緩  
據阿桂稱一面攻色湖普向西山腿之碉一面分路  
潛上直取喇穆喇穆中間之碉卡不論何處得利均  
可順山攻壓直取遜克爾宗等語所籌甚是如此設  
法攻勦必能迅速得手至前此豐昇額奏欲帶滇兵  
仍回凱立葉進攻較之初奏欲回宜喜分勦之說自  
為有理是以諭令前往凱立葉今阿桂既攻得色湖  
普剋日可以架入豐昇額又以助阿桂攻勦為是所



謂軍營機要移步換形者正指此等而言阿桂等當  
努力建勲佇膺茂賞勉之望之又閱奏到脫出番人  
雍中等供詞有聞得賊酋有斷登古後路之語此等  
傳聞寧可信其有按圖內登古在喇穆喇穆東北距  
大營不遠而登古了口在博羅瓦谷噶之間其去軍  
營尤近賊由得斯東山溝固可潛出而凱立葉一路  
現降旨令五岱加緊防守至登古等處傳諭阿桂就  
近派委勇幹之員時刻嚴防富勒渾等亦應一體留

心防範且又須處以鎮靜不可因有此語過涉張皇  
總之成功愈近則防守愈宜周密方為萬全

同日阿桂豐昇額色布騰巴爾珠爾又奏言此次  
進兵攻色溯普賊礮時有把總陶思連攻撲一二  
礮均首先騰上手舉紅旗招兵接上砍殺賊人於  
次日鎗傷殞命又把總胡朝臣先經斥革留營嗣  
因打仗奮勉拔補平越營把總未准部覆今於攻  
打第三礮時首先上礮次日中鎗陣亡請將陶思連

照千總例胡朝臣照把總例各予議恤奏入

上諭內閣曰阿桂等奏陶思連胡朝臣以微末員弁俱能奮勇先登撲斃殺賊以致捐軀均堪憫惜著各賞銀一百兩仍照所請交部照例議卹

同日五岱奏言臣准將軍阿桂移知谷噶一路業已攻克碉卡臣凱立葉一路亦當奮力進攻因酌量於各營調兵六百名令副都統書麟等分攻各山峯碉卡六月二十一日丑刻飭令前往官兵奮

勇攀登直至賊人碉卡賊衆放鎗甚緊且又推轉大石往下搏擊官兵殺賊十餘人攻至天明將兵撤退所有陣亡帶傷千總吳正學把總于國良外委曹玉林等當即咨部辦理臣現在留心察看俟有可乘之機亦即領兵攻搗奏入

上諭軍機大臣曰此次五岱遣兵攻賊山峯殺賊祇十餘名而我兵傷至三十餘名何可如此今將軍阿桂等計日可克遜克爾宗至時阿桂等派兵迎接夾攻

五岱等即可前進此時且無庸派兵攻取惟將出而  
侵擾之賊痛加洗殺不得冲擊碉卡與石相併致有  
損傷再據阿桂等奏金川脫出番人供云賊勢已迫  
擬出登古前來侵擾後路等語今校閱地圖登古即  
在阿桂之後距凱立葉甚近此處所關甚要五岱務  
須留心防範斷不可使賊入越過以致出而侵擾

同日郝碩奏言查各站人夫原係酌量繁簡每站  
分設或六百八百一千名不等惟計足數應用不

便多設致糜帑項但各站每日尚有過往一切雜  
差均須人夫應候其由內地至軍營者謂之上差  
由軍營至內地者謂之下差其上差之夫無庸置  
議惟下差之人每日自數十名至百十餘不等該  
夫于差竣回空時向無自下站背米帶回之人但  
即日我兵攻取遜克爾宗愈進愈遠誠恐滾運米  
石不能加增臣查各站下差人夫每日俱有數十  
名及百餘名不等與其空手而回莫若即令順便

背米一斛帶回本站於給發雜差工價外仍再酌  
給背米工價一半不必另給口糧是衆夫順便攜  
帶多得工價自所樂從如此順便趲運統計自軍  
營至桃關各站每日可增米數百斛且腳價亦可  
稍省似有裨益奏入

上嘉之

同日劉秉恬奏言查南路糧運以雅州為起運軍  
米總匯之所而打箭爐則為轉運軍營總匯之區

是打箭爐貯米稍多既可接濟軍糧且向有應存  
西藏軍臺米二千石常平倉米四千餘石用兵以  
來俱已借用無存將來凱旋時如有數餘即可以  
之撥歸原款均不慮其運貯過多但由雅州至打  
箭爐計程六百餘里俱係層山疊嶂路徑險仄輓  
輸頗覺艱難近因有添兵分勦之信經督臣文綬  
侍衛桂林等嚴催趕辦打箭爐已存米九千八百  
餘石轉運軍營自可敷官兵支食臣正擬馳往前



途親加催趨據副將軍明亮咨稱六月二十一日  
隨帶官兵七千人自甲斯柔起程由木池周叟格  
江從噶克卓克采一路取道前往凱立葉進攻所  
有甲魯現存米石軍裝火藥應隨入夫捲站之便  
運回章谷其在途糧石並飭臬司李世傑停止等  
語臣查章谷為馬尼一路存糧之處路通吉地而  
吉地則專為正地一路存糧之處且由打箭爐  
長運每米一石吉地需銀九兩四錢章谷止八兩

六錢零為費較省今既不由正地進兵自應將吉地軍糧改運章谷惟是打箭爐自五月初一日至六月十五日雇用蠻夫烏拉由噶爾塔爾長運吉地之米已共有八千餘石或即令原馱烏拉轉運章谷或由站滾運章谷以資貯備臬司李世傑等在彼自能妥辦其甫到噶爾塔爾及現尚在途者即專派弁兵飛赴噶爾塔爾緊行截留令其就近改運章谷以昭省便至雅州發運軍米現在杜玉

林在彼籌辦臣已密札該道令其統計軍營及打箭  
爐運到米數酌量減運以省糜費奏入

上諭軍機大臣曰劉秉恬前因正地進兵是以調赴南  
路督辦糧務昨明亮奏移兵前赴凱立葉即經傳諭  
劉秉恬迨回其南路糧運等事仍交桂林專辦矣又  
西路既添明亮兵七千名其軍糧亦應寬為預備著  
傳諭富勒渾等即行酌量添運務須妥協經理以裕  
軍食而襄大功

同日文綬奏言查明亮移師至凱立葉所有經過北路地方周叟現存米一千一百餘石從噶克現存米七百餘石卓克采現存米三千八百餘石此次官兵沿途支食不虞缺乏惟支用之後應籌添補而北路官兵亦須添運日支之米臣今藩司錢璽將灌縣運到社米五千石招商運至卓克采交收滾運前進以補支缺以資兵食至移抵凱立葉之後需用兵糧仍歸西路供支現在西路軍糧本

屬寬裕即添兵亦無不給惟大板昭至凱立葉中  
間有色木多等五站各站設夫無幾恐尚不敷輓  
運應每站各加一百五十名至南路既已移兵西  
路則人夫亦宜酌減應將裁下人夫移設西北兩  
路現同軍需局司道並札致富勒渾劉秉恬等妥  
協籌辦又計南路移兵後兵數已減三分之一所  
有前次

奏辦南路八屬軍米由打箭爐轉運至章谷之米酌將

嘉眉二屬常監米二萬石改運楸砭以供西路軍  
營其前此籌辦正地米內應將嘉眉二屬辦運米  
一萬四千石飭令暫為緩運又打箭爐由噶爾塔  
爾長運吉地之米亦應早為停止其已運在途者  
交章谷存貯以供南路兵食所有甲魯等處存米  
就近運回吉地以備防兵之用亦可不致糜費奏  
入

上敕軍機大臣速議具奏經軍機處奏覆請如該督所

奏分別存減以歸搏節

上從之

丁巳明亮奏言

臣

因斯喀爾用兵不能得力議請

改赴凱立葉數日以來甲魯所存糧石火藥本屬  
無多除裹帶外均已全數運回章谷人夫亦已全  
撤其後路各卡隘如格爾格堡迪達格爾頂珠爾  
德格楞等處從前舊有防兵俱令副將鄭國卿帶  
至吉地酌分默資溝駐守一面即將丹東調到吉

地各兵撥回原處存駐並傳土都司丹津扎布及各頭人到營諭以西路軍營現於十二三等日攻克碉卡今又將南路大兵撤赴西路會勦爾等惟當嚴守疆界倘有賊人竄入即當擒獻自與攻勦一體論功據丹津扎布等稱我等情願在甲魯一帶修起戰碉輪派土兵防守先是臣接舒常札知與綽斯甲布文界之舍衛格羅現已發派佔取賊卡三座大兵或可由此進攻臣當派阿爾都阿蘭



保即赴該處確探據稱自柔染爾進去五十餘里  
俱在樹林深處到新得三千之處其下隔一深溝  
賊人即於對面山梁排列戰礮拒守我兵若越溝  
進攻必致傷損且後路深遠賊人處處可來抄截  
實難防範是舍衛格羅未便輕議用兵現已札覆  
舒常將原派官兵聽其酌量撤回另用臣查阿桂  
一路現當殺賊奪礮軍聲大振乘其膽落之時再  
於凱立葉迅速添兵合勦實有裨益因於二十日

自甲斯柔帶兵至甲爾壘壩將甲魯運到米麩分  
配各兵裹帶即於二十二三兩日分作兩隊先後  
起行奏入報

聞

同日明亮又奏言

臣前奉

諭旨以草布什咱舊土司久為金川所害現在庸中旺  
嘉勒因何得統番衆臣查已故土司策楞多布丹所  
遺一子名諾爾布湛都爾即屬霍爾章谷土司外

甥現在年僅九歲在彼留養今丹津扎布為策楞  
多布丹親叔先為喇嘛迨乾隆三十七年大兵收  
復草布什咱後本境各番無人約束暫推管理嗣  
于三十八年正月經將軍豐昇額

奏請賞給土司職銜至于庸中旺嘉勒係策楞多布  
丹族叔而為正地土舍前此金川佔奪正地該犯  
即行投順復于三十六年四月勾通金川將其姪  
策楞多布丹謀害仍又竄入金川現為逆酋帶兵

打仗草布什咱番人無不切齒痛恨惟查各番衆現在願奉為土司者亦各不同其在吉地以西丹東渥堵等處則歸心于丹津扎布其在吉地以東達桑瓦覺等處則歸心于諾爾布湛都爾各以私意求請立為土司臣諭以土司印信現被賊酋掠去且土婦亦陷身賊境爾等只宜齊心出力為舊土司報讎一俟平定金川奏請

大皇帝欽定承襲土司使之各無絕望以安其心奏入

上嘉之

欽定四庫全書

平定兩金川方略

三

平定兩金川方畧卷九十九

欽定四庫全書

平定兩金川方略卷一百

七月己未阿桂豐昇額色布騰巴爾珠爾奏言

臣

等察看喇穆喇穆一帶山梁各碉內其東邊附近  
登古了口并近南薩斯嘉赤溝各碉防備均為堅  
固惟普爾普官兵相對之大碉及迤西峰巒突起  
處之兩大碉在山梁絕頂兩面坡崖如削我兵進  
攻須從北面羅博瓦山梁下至深溝復行攀越山

勢更為陡絕賊度官兵不能來攻但得佔此絕頂則已斷其後路其外各碉必俱成瓦解臣等於二十日晚令額森特烏什哈達等帶兵分為兩路進攻色泐普向南山腿賊碉福康安帶兵接應又令普爾普海祿等帶兵進攻喇穆喇穆山梁東邊與木城相對之第一賊碉保寧彰雷等帶兵進攻其次賊碉並令成德特成額六十六等進攻喇穆喇穆左邊山腿皆以亂賊人之耳目而掣其力其



海蘭察官達色泰斐英阿格勒爾德等則帶兵直  
取喇穆喇穆山梁迤西峯巒突起處之兩大碉但恐  
兵數過多行走不無聲響轉易為賊番所知因於  
滿洲吉林索倫綠營屯土各兵內挑選兵六百餘  
名分為兩隊潛上並令各處官兵均視海蘭察所  
帶之兵已至山巔然後一齊攻擊二十三日寅刻  
額森特等探望海蘭察等官兵已抵賊碉之下遂  
率兵直趨色溯普向南山腿詎賊於碉外挖有溝

濠三道官兵爭先跳躍越過兩重前抵第三重益  
加深濶賊人悉力守禦擲石放槍官兵即在溝邊  
箭射矛戳殺死多賊屢次進撲不使賊人少容他  
顧其普爾普等所攻喇穆喇穆東邊第一賊碉官  
兵不避鎗石擲拋火彈刨挖碉根賊人窘迫出碉  
抗拒官兵鎗箭齊發斃賊甚衆並有穿紅頭人被  
官兵射中其背帶箭奔逃餘仍入碉死守其成德  
等一聞普爾普處鎗聲奮迅前進先將賊人護碉

木卡攻開連克石碉四座而賊碉內放鎗甚緊抵  
死不出維時海蘭察等所帶各兵先於半夜月出  
之前魚貫而上不但並無人聲並將火繩藏起但  
此處本無路徑石壁陡滑官兵等手足並用且以  
手攀手蟻附而登至丑刻均已於賊碉附近處埋  
伏及至黎明一湧而登直上峯巒突起處碉頂砍  
開碉門躍入將賊衆盡行殺死隨即進撲尾碉圍  
攻數刻亦即抉門直入奮力勦殺並將尾碉下木

城兩座放火圍燒木城內賊人悉為燒斃其普爾  
普成德保寧等所攻各碉賊人拚死抵拒施放鎗  
石恐致多傷傳令官兵將碉圍住更番攻打及戌  
刻大雨淋漓官兵不但徹夜站立雨中毫無倦怠  
且將火藥火繩弓箭俱用衣服苫蓋以免沾濕至  
四更時賊於碉內放鎗舉火虛張聲勢知其欲行  
逃竄普爾普等所領各官兵向前吶喊鎗箭齊發  
賊遂棄碉遁去惜黑夜雨霧之中未能盡為殲戮

隨將各碉佔據至二十四日竟夜大雨二十五日  
早大霧迷濛海蘭察復率官兵循喇穆喇穆山梁  
尾碉而下乘勢搶殺西南兩道山腿碉卡官兵新  
勝之後勇氣倍增並攻克日則了口各碉卡亦多  
殲戮共計是次攻得戰碉三十六座木城五座石  
卡五十餘處平碉一百餘間殺賊百餘名奪獲騾  
馬及礮位火藥鉛彈鳥鎗刀矛口糧等物甚多查  
喇穆喇穆山脊向西迤邐而下又分為三股一股

為什爾德一股分往拉枯喇嘛寺其勢俱可抵勒  
烏圍但喇穆喇穆及博羅瓦一帶所分兵力已多  
而新得地方又尚須視其緊要處所派兵駐守以  
現在兵數計之自不能遽行分進至向西北山山  
腿一股可以下至遜克爾宗其上雖有兩礮不難  
攻取即或賊人攢集固守臣等運礮轟摧數日之  
間乘此銳氣必能克獲臣等現於後路內酌量抽  
撤官兵調至前敵以便隨機攻勦迅期深入奏入

上諭內閣曰喇穆喇穆山梁原為此路賊人第一要隘  
山形絕險碉卡最堅而日則了口亦進攻勒烏圍要  
路在所必爭今官兵等皆攀躋登越奮不顧身雖遇  
雨夜霧晨彌加勇往殺賊攻碉靡堅不破而海蘭察  
不避險隘每攻必克尤為超軼出羣堪稱勇將皆由  
將軍叅贊等相機抵隙調度有方故能所向克捷朕  
心深為嘉悅所有將軍叅贊以下鎮將弁員均著交  
部從優議叙其實在出力打仗得功兵丁除交部照

例議叙外仍著阿桂等查明賞給一月錢糧以示優獎

同日阿桂豐昇額色布騰巴爾珠爾奏言明亮抄寄摺稿稱正地一路難以用兵現帶兵七千名移赴凱立業協同五岱進勦等語明亮係統領官兵身親目擊之人今既稱此路難以力取即由正地之黃草坪循溝直進穿林越箐全無把握謂戰守皆非所宜自可無庸再議第思賊衆止有此數官



兵四面力攻自不能處處固防嚴密只須一路官兵乘隙攻開便可潰其心腹今臣等一路自攻得色溯普後又將喇穆喇穆山梁碉座攻取佔據從此得手下壓賊巢則五岱處凱立葉官兵便可前來會合並非必需明亮帶兵助勦况賊境處處險阻一夫當關之地甚多若官兵羣聚一處賊亦悉其醜類死守一處是非所以分其力而轉使聚其力於攻勦全局殊非勝算查綽斯甲布自今歲以

來土司頭人實出心力殺賊破碉屢有明驗特因  
舒常處兵力稍單不能將攻得之碉據守以圖前  
進是以臣阿桂當即繕札告以三路將軍聚於一  
路于理既為未協而向來籌辦總以分開賊執為  
主今再三商酌綽斯甲布土兵近來屢次進攻倍  
為出力且該處在在毗連金川此外或尚有可進  
之路若果可由彼進兵則賊勢一分兩路內不論  
何路能進均於大局有裨且既帶兵經由綽斯甲

布其地情形自經目擊而該土司頭人光景亦可  
親加體察此事關係重大如果可辦即改奏似無  
不可現已飛寄去後統俟其如何酌定覆到再行  
馳

奏奏入報

聞

同日阿桂豐昇額色布騰巴爾珠爾又奏言據五  
福稟稱前准札諭六月二十日前後各路大兵約

齊攻搗即同副將李天佑密傳該土舍頭人湊派  
土兵一百六十名又漢兵一百名三雜谷兵一百  
名以為接應十八日先令官兵作為攻撲之狀以  
綴穆爾津岡正面山梁各碉賊勢隨令丹壩土兵  
於作固頂水卡左右埋伏以便搶殺賊人似有知  
覺天明後山梁下忽有騎馬頭人一名帶領五十  
餘賊前來直撲水卡土兵見賊將近一齊放鎗將  
騎馬頭人擊斃並殺賊四名帶傷者甚眾各碉卡

賊人聞聲來救丹壩土兵因即割取頭人首級緩  
緩撤回臣等查丹壩土兵無多原不能痛為勦殺  
今不時殲斃賊人殊見實心出力已行令五福傳  
諭土舍等大加獎勵並飭以此後仍當審度機宜  
隨時搶殺金川一滅即可承受

天朝恩典庶使其益增踴躍奏入

上諭軍機大臣曰阿桂等奏據五福稱見有騎馬賊目  
一名領賊前來經土兵放鎗擊斃等語是賊中竟有

馬匹若官兵進搗賊人巢穴恐逆酋窘迫騎馬奔竄官兵不可無馬尾追現在軍營馬匹甚少必須預為籌備著富勒渾文綬并諭錢釐各令購備壯健馬匹迅赴軍營約共得有百匹即可敷用極少亦須五六匹滿洲索倫勇銳之兵再得好馬可供追勦斷不慮賊人復有竄逸之事富勒渾等務即遵旨妥速辦理

同日富勒渾郝碩奏言查喇穆喇穆山溝本係糧

運正路前因賊人據碉死守是以由羅博瓦等處  
繞道運供今喇穆喇穆山梁既經全得即可直通  
前敵營盤自應於正路之牛廠安設臺站始為捷  
近所有官員夫役久已備辦齊全臣等於拜摺後  
即馳赴軍營與將軍阿桂商定妥為安設以利轉  
輸奏入

上嘉之

庚申

上諭軍機大臣曰阿桂現已攻得日則丫口計日進抵  
勒烏圍賊人勢當窘迫自必悉力拒守前曾計用衝  
天礮轟擊成功更為迅速因派阿彌達運帶礮子及  
礮式並測量之人前往但測量必須極準方於事有  
濟因思測量之法西洋人較內地人員尤為精熟著  
傳諭舒赫德於蔣友仁傳作霖二人內詢其測量之  
為最精派令前往現派侍衛班長德保帶同馳驛迅  
速赴阿桂軍營聽用



臣等謹案官軍鼓勇前進奮掃碉寨必特用礮轟擊始能無堅不摧前蒙

皇上以衝天礮倍為得力飭令試演定準運往軍營如式鑄造並帶測量人員審度形勢高低使機線遲速不差銖黍

睿慮已周密靡遺茲復念西洋測算尤稱精熟選員馳往其後進攻勒烏圍噶拉依霆擊賊巢益資轟摧之力皆仰賴

神威妙用故迅捷歲功等於摧枯捲籜也

甲子明亮奏言

臣

於六月二十日自甲斯柔帶兵

起程於二十四日前抵綽斯甲布之木池接阿桂  
來札以凱立葉一路無需添兵應即於宜喜日旁  
等處另覓間路牽制賊勢較為有益並據土司雍  
中旺爾結及頭人溫布松乃等到營稱土司蒙

大皇帝格外施恩惟有立誓早滅金川以圖報効自從  
豐將軍兵分往西路兵力未免不足今年幾次打

仗土兵受傷者甚多至於未經奪取地方雖係山  
勢險要亦因兵少膽怯今正值將軍到此懇暫留  
幾日遣人探明道路發兵前進等語臣前在甲斯  
柔已准舒常知會綽斯甲布土司番衆咸有請兵  
之意其時因此路難以進兵未便冒昧許可今順  
道經由境內而該土司再三稟懇留兵協勦幾至  
涕泣若遽為屏絕恐失其効順之心臣思凱立葉  
一路原因賊人專心聚守谷噶以前驟難進步自

不如以此兵衆與阿桂并力共濟乃西路既無需  
添兵而綽斯甲布果可伺隙而進亦足與阿桂遙  
為聲援因不敢拘泥前

奏坐失機宜雖宜喜日旁土兵連年攻取旋進旋撤  
不無疲玩成習而臣用言激勵察其氣象頗為踴  
躍可用隨差幹練弁員協同該土司所派頭人潛  
赴各路察探並即會商舒常將何處可以分兵何  
處可以合兵得有間道通盤籌算定局即通知各

路軍營鼓勵將士尅日進攻務與阿桂隔河並下  
萬一不能得手而盡銳力攻亦足以分其勢而奪  
其魄至此路應用口糧詢之知府盛英附近各站  
所存糧石尚可支持一月將來大兵乘勝窺入即  
在西南兩路設法並運亦能無悞奏入報

聞

丙寅阿桂豐昇額色布騰巴爾珠爾奏言查小金  
川地方尚有零星秋麥現在已當成熟自不可任

賊番偷割臣等前經

奏明賞與鄂克什及別斯滿窮番收割而令穆塔爾  
賡噶等帶領土兵前往防護並順便搜勦賊匪今  
為期已屆即遣人帶兵前往但此時大兵從喇穆  
喇穆攻進將抵賊巢賊首方悉其醜類於此抗拒  
其功噶爾拉木果木一帶賊卡未必更有多人據  
守若可帶兵潛往搶殺亦足挫賊人之氣此處雖  
距美諾底木達尚遠兵數無多不能佔據其地而

賊酋心疑又將於此處進攻派人防守更可以稍分其勢穆塔爾等已於六月二十九日起身會同鄂克什土司并派出土兵潛往辦理奏入

上諭軍機大臣曰阿桂奏稱小金川地方尚有餘麥派出穆塔爾賡噶等帶兵收割并計功噶爾拉木果木賊匪為數必少如有可進之機即勦殺以分賊勢等語所見甚是現在阿桂等由喇穆喇穆攻克色湖普日則丫口指日可抵遜克爾宗賊人正在此處周圍

聚守其功噶爾拉木果木等處賊人必少猝然乘隙  
奮攻或能得進俱未可定穆塔爾等帶兵無多自難  
冀其窺入常青現在底木達布朗郭宗駐扎相離甚  
近伊處尚有兵丁况自彼進兵係迎賊而進又無侵  
擾我兵後路之虞常青接奉此旨即帶兵趕上穆塔  
爾等查看彼處情形相機辦理并寄信富德就近帶  
兵前來會同妥辦

同日郝碩奏言大兵窺入現抵日則了口進攻遊



克爾宗過此即係勒烏圍賊巢程站逾遙需用軍糧自應加緊趕運俾無缺悞再梭洛栢古一站為西北兩路分運總匯之所該站雖尚有存貯米石但現在陸續供運西北兩路支放則儲蓄之數比前不無稍減且我兵一得勒烏圍其宜喜凱立葉兩路官兵均可會合則軍需倍多更不得不寬為預備臣商同督臣富勒渾將節次所派大板昭商米撥出三分之一直運至梭洛栢古收存並將從

前未完商米亦令其直運該站交收不但腳價可  
省即將來趲運勒烏圍亦比大板昭黃草坪較近  
數站且此項米石既經長運至梭洛栢古並可將  
此項所餘夫力多運本站軍糧軍火庶貯備既屬  
充裕趕運可期迅速奏入

上嘉之

同日富勒渾鄂寶奏言臣等准將軍阿桂札稱現  
在

奏明咨商副將軍明亮將所帶兵七千名順赴宜喜

軍營會同叅贊舒常合力進取等語查前因副將

軍豐昇額帶兵改赴凱立葉會勦經臣等將北路

一帶夫糧酌量減裁以歸節省今南路官兵既復

改赴宜喜兵數驟加一切夫糧等項又須趕緊籌

備且周叟宜喜等處現在存米無多若僅恃灌縣

招商輓運尚恐緩不濟急查楸砮現有運存西路

米四千餘石臣等當飭糧員張克明即於此項米

內撥出二千石每日務以二百石趕運別斯滿轉  
運北路定限十日全完俟運供北路之米陸續暢  
行再將原米二千石歸還楸砥一轉移間既可無  
悞兩路軍儲而趕運更為捷便至北路兵數既增  
站夫亦應添設臣富勒渾查西路換班長夫四百  
六十名計日可到隨令此項長夫先行截赴卓克  
采應用交臣鄂寶均勻分撥以速轉輸奏入報

聞

丁卯

上諭軍機大臣曰前因功噶爾拉木果木等處似有可  
進之機令常青帶兵趕上穆塔爾查看彼處情形並  
寄信富德協同辦理但富德之絨布地方亦甚緊要  
常青確勘情形如果一鼓可進即寄信富德令伊前  
來辦辦倘或無益只可帶領穆塔爾等約束鄂克什  
別斯滿人衆收割麥苗嚴加防禦倘遇賊匪即行洗  
戮毋庸寄信富德即穆塔爾等兵數無多亦不宜深

入富德尤當相機籌畫以期萬全不可稍有輕忽

戊辰阿桂豐昇額色布騰巴爾珠爾奏言查喇穆  
喇穆山梁迤下三股其向西北者名該布達什諾  
是處現存賊碉一座並山巒突起處大木城一座  
雖醜徒守禦甚堅山勢亦極陡險但乘此勝勢進  
攻自不難摧破因於初五日寅刻雨霧稍停之時  
即派海蘭察官達色泰斐英阿等帶兵三隊突至  
溝邊賊人知覺抵禦拋石放鎗如雨而下官兵奮

力爭先躍過壕溝或挖剝礮根或緣礮而上賊見官兵勢猛從礮逸出均經官兵截殺其匿在礮中者已經殲戮無遺其礮外相近之木柵石卡賊人見大礮已破分頭逃竄官兵趕上亦多殲戮所餘大木城一座在山巒突起之處且山脊兩旁林箐深密若令官兵直前攻撲仍恐不免多傷尚須拏柵進逼臣等督率官兵即於初五日樹起柵座至初六日已起六座逼近賊城兼用鎗礮環攻即日

發兵攻搶務期必剋

同日阿桂豐昇額色布騰巴爾珠爾又奏言臣等

接准明亮來札稱已親赴宜喜山梁察看情形定

於初四日分打各碉得手之後即擬從此直入等

語查明亮昨抵綽斯甲布地方土司及大頭人等

赴營涕泣請留情願踴明道路並有搜集土兵共

効死力之語如果實心出力自可望其得利且臣

阿桂前此訪問宜喜一帶形勢有言並非必不可



辦者而從羅博瓦對面望宜喜一帶雖山脊之上  
排列各碉甚為堅固若一經克攻向河而下尚非  
險阻且如宜喜官兵向南下至河邊臣等谷噶一  
路之兵亦向北下至河邊是已將賊境東北一帶  
各寨落截斷在外此各寨賊人諒必非降即竄而  
凱立葉丹壩官兵均無阻滯可以前來會合由此  
合攻策穴聲勢更為壯盛因即札覆明亮以既定  
於宜喜進攻即可在彼竭力籌辦如果得手為益

更大至臣等一路官兵自羅博瓦色溯普各處屢次打仗殺賊已為不少而色溯普喇穆喇穆賊所恃以為萬無可慮者又均被官兵力攻而得賊人寔已心膽俱寒以大勢計之直搗勒烏圍自不至久淹時日屆時河之南北皆有官兵而臣等又已預備造船物料將來官兵乘船往來過渡自可隨機辦理况明亮於南路形勢本為熟悉若大兵至勒烏圍後即帶兵從宜喜正地各山梁之下循河

而南直至噶拉依對岸即已出馬爾邦之後可與  
富德等兩面夾攻賊境西南一帶又不難於掃淨  
今於初六日辰刻雲開日出之時遙望宜喜山梁  
賊碉數座俱已不見但見官兵營盤七座此必係  
明亮等合力奮攻已經得手二三日間自有確信  
若果如此歲事之期自當更速

同日阿桂豐昇額色布騰巴爾珠爾又奏言臣等  
接奉

上諭查達爾圖山梁西邊菁林內賊人改裝漢兵之事  
竊思賊人本狡詭異常而逆犯張坤忠既叛逃附  
賊從中指嗾令其改裝潛出希冀搶掠我兵自為  
情事所必有臣阿桂前在當噶爾拉時誠恐土兵  
偶與賊人相混曾令各土兵帽頂均用布條號片  
以為別識嗣後賊人照樣帶用希圖淆混復經臣  
阿桂察出即將號片或十日五日一換顏色賊始  
無所施奸計其改裝漢兵從前未有此事蓋因上

年木果木等處失事所得漢人衣服頗多是以為  
此狡獪臣等此路寔未曾經見至僧格桑之死歷  
詢脫出番人及擒拏活口皆稱賊酋恐將僧格桑  
送出轉為其控告是以用藥毒死即埋於遜克爾  
宗衆口僉同似無疑義查前此賊酋欲將僧格桑  
送出官兵等未免妄想可以藉此了事今僧格桑  
已死各官兵共知金川不滅斷不罷兵心志轉為  
堅定現在大兵節次攻進將抵賊巢賊人猶復不

時呼喚臣等飭令土弁土兵等不必與之多言第告以爾等果欲求生須將土司索諾木及丹巴沃咱爾縛獻軍營尚可苟全性命所以不併及莎羅奔與各頭人者蓋因前此番衆供稱伊等兄弟不和而丹巴沃雜爾又為百姓所惡若莎羅奔等聞言心動使其自相魚肉或亦離間之一法

同日阿桂豐昇額色布騰巴爾珠爾又奏言查滿洲兵丁勇銳超羣固非屯土各兵可及而弓箭勁

利土兵無不樂於隨行恃以無恐但既不能習熟  
此間路徑且與番衆同行言語不通必須重譯倉  
猝之間呼應不靈是以搜拏夾壩不多派往至軍  
營打仗不惟對面衝殺俱係滿兵首先率往即攻  
碉奪卡滿兵鼓勇爭先從不專恃土兵且節據脫  
出番人俱稱賊番最畏我兵弓箭而綽斯甲布頭  
人溫布松乃來營皆請於宜喜日旁添派弓箭手  
又據隨營土弁等稱從前曾見官兵與金川打仗

未有如此番勇勁亦從未見金川人如此畏懼者  
此皆指吉林索倫勁旅而言則土弁土兵之心服  
推重已可概見均奏入

上諭軍機大臣曰阿桂等奏初五日攻克該布達什諾  
大碉卡柵尚存一大木城即日可期必克等語覽奏  
欣慰看來官兵一得此處即可乘勝策入直抵勒烏  
圍自當大有得手佇盼捷音又據覆奏軍營打仗俱  
係滿兵首先率往即攻碉奪卡從不專恃土兵等語



如此方是金川賊首罪大惡極為天地所不容破賊擒渠計日而待今土兵等既知推重吉林索倫勁旅使衆聞之更足令其鼓舞勇往可期迅奏膚功又據奏初六日辰刻遙看宜喜山梁賊礮數座已均不見但見有官兵營盤七座在上必係明亮等合力奮攻竟已得手等語此更非意想所及尤為可喜明亮得有勝仗必為奏聞想因程站稍遠不能與阿桂奏函同到約計一二日內亦即可得喜音耳明亮果能從

宜喜攻進與阿桂會兵直抵勒烏圍則攻取賊碉自  
更迅捷又據阿桂稱并可從宜喜正地各山梁下循  
河而南至噶拉依對岸即出馬爾邦之後與富德等  
兩面夾攻自當留舒常仍駐宜喜以防後路兼為明  
亮聲援方屬萬安明亮由此路攻進甚為得力且係  
獨當一面其功較之隨阿桂助勦者尤大矣

同日桂林奏言

臣

准明亮札稱大兵現駐扎木池

在宜喜日旁覓路進取前據李世傑稱吉地尚存

麵二萬餘觔米五千餘石如速雇烏拉或米或麵  
從丹東運來接濟實為便宜臣查此項米麵前因  
明亮移軍凱立葉所需糧石應歸西路供支自不  
得不運存吉地以充該處防兵口糧並酌量運回  
絨布大營今明亮既從中道改駐木池正當相機  
進取之時臣已飛行兵備道李本即將所存米石  
除酌留防兵口糧外餘一併運赴木池至由丹東  
而木池沿途並無糧站向覓烏拉長運臣已飭員

上緊雇備領運趨行且查此項米麵自吉地運至絨布寨與改運木池兩路程途大略相等今一轉移間不惟目下明亮軍營適濟急需且無須滾站運回夫力亦大為節省奏入

上嘉之


同日富德奏言臣每日派兵五十名或百名輪班巡查後路凡要緊處嚴行防守再令穆谷庚額特卡卡角等處防兵就近查看乘賊稍懈即帶兵進

勦又派熟悉道路土兵周圍密探並無可進之路  
臣思預先埋伏進兵誘戰尚可痛殲賊人遂派章  
京舒亮巴克坦布等帶兵二百名再撥穆谷營兵  
三四百名令於夜間前往穆谷山兩旁林內埋伏  
又派章京書金泰副將開福等帶兵百名暗登庚  
額特山梁奪取山頂碉卡初二日丑時潛上山梁  
方欲攻奪賊知覺有賊百名從碉突出直衝官兵官  
兵等奮勇上前施放鎗箭擊斃賊番三十餘名被

傷甚多敗逃入碉堅守不出舒亮又令兵丁八名  
前往引誘賊見我兵人少前來圍取意欲追擊我  
兵一面放鎗一面引至埋伏處所我兵兩路衝出  
擊斃賊二十餘名餘仍敗入碉卡至土兵僧格殺  
獲賊目一名首級上現有銀環訊係頭目拉巴納  
瑪木爾嘉臣查僧格係汗牛降番隨賞給千總頂  
帶以示鼓勵奏入

上諭內閣曰舒亮打仗奮勉超衆出力著加恩賞給副

都統職銜降番僧格手殺賊人頭目甚屬可嘉著賞  
給千總頂帶並賞銀五十兩以示鼓勵



平定兩金川方畧卷一百



欽定四庫全書

史部  
平定兩金川方略卷一百一  
三

員外郎<sub>臣</sub>顧宗泰覆勘

總校官原任侍講<sub>臣</sub>王燕緒

欽定四庫全書

平定兩金川方略卷一百一

七月己巳明兜舒常奏言

臣

明亮帶兵前抵木池

即會同舒常將領斯甲節以賊毗連道路逐一籌

計查達爾圖山梁自煉北以至西南橫亘數里賊

於頭敵山嶺堅立四碉聯以石牆深挖濠溝俱至

丈餘實為至險至堅之地由北迤邐而去直至俄

城相連戰明又有十四座每碉中間復砌以石十

聯絡聲勢其陡礪下俱係深林密箐圍繞在賊人  
用心抵禦誠已不留餘地然臣等破釜沈舟在此  
一舉因公同商酌查此一帶山梁勢如長蛇首尾  
相應若于中間截斷攻之自易為力但賊人於此  
一段連築七碉兩日以來鎗聲愈密似已添衆助  
守非每碉專選領隊大員配以滿漢勁兵分頭攻  
擊不能得手隨派奎林等帶兵攻取西南第一第  
二兩碉此兩碉緊接俄坡恐賊從旁突出復派舒

景安等帶兵預防其第三碉則派和隆武等向上  
攻取其第四碉則派三寶第五碉則派珠爾格德  
第六碉則派侍衛科瑪第七碉則派前鋒叅領葛  
塔布各同將領侍衛帶兵向上攻取臣等又各派  
兵以資接應其俄坡格爾克古一帶尚有七碉令  
都司崔文傑守備張芝元饒祥等即將帶來屯練  
同綽斯甲布土兵三千名協同攻取初三日夜各  
隊攻碉官兵先就隱處埋伏初四日將近黎明大

雨如注而各官憤激之氣急欲發抒臣等所攻頭敵官兵先已冒雨而進直撲濠邊賊見軍鋒勇銳齊出抵拒其西南各碉內賊人接踵而至正在格死相持而林中所藏官兵喊聲並起直搶上山各認所指賊碉圍攻四面其時雨勢愈下愈緊火繩沾濕不能放鎗而賊衆亦僅於碉內飛石相擊官兵見此情形膽氣愈壯逼近碉根一齊用力挖刨和隆武所攻第三碉甫經打破而奎林第一第二

兩碉同時攻克並山後尚有一碉乘勢佔據其四  
五六七各碉三寶珠爾格德科瑪噶塔布等均以  
次攻獲旋據土兵報稱俄坡格魯克古賊碉七座  
亦已全數攻克惟頭敵四碉地當險絕且各碉內  
賊人先來救援被兵牽綴聚守於此攻之一日尚  
未能破然迤南一帶山梁既為我兵所據則東北  
四碉其勢已孤斷難負隅自固臣等查達爾圖為  
賊人至要門戶恐其復來爭奪已將各碉及所得

石卡盡行折毀一路安設壘營嚴加防範一俟攻  
克四碉踞探前途乘此席卷之勢與阿桂等隔河  
並下迅搗賊巢計此次共得戰碉十五座所獲破  
位烏鎗糶杞什物甚多生擒大頭目丹巴阿汰及  
散番八名其漢土官兵傷亡數日照例造冊咨部  
至領兵大小各員均為奮勉擇其勞績出衆者再  
行

奏明獎賞奏入

上諭內閣曰昨據阿桂奏克攻該布達什諾摺內稱初六日遙見宜喜山梁已有官兵營盤七座在上等語因盼望明亮軍報甚切今明亮奏至果於初四日鼓勵將士乘銳直攻其達爾圖及俄坡各碉均已奮迅克獲實由將軍明亮等抒誠殫力董率有方故能所向克捷朕心深為喜悅所有將軍叅贊以下將領弁員及土司土舍土目均著從優議叙至此次官兵等冒雨進攻尤為奮勉出力除交部照例議叙外仍均



賞給一月錢糧以示優獎

上又諭軍機大臣曰明亮奏攻克達爾圖山梁礮卡覽  
奏欣慰已有旨交部從優議叙矣達爾圖一帶賊礮  
昨歲屢攻未得不意明亮竟能盡行攻克此皆仰仗  
上天嘉佑大功應即告成乃能迅獲全勝若此而明亮之  
調度有方領隊大臣等之奮勇直進及兵丁等之不  
避大雨踴躍集事均屬可嘉至阿桂扎令明亮留兵  
宜喜進攻今果能得勝其籌畫甚為得當即此可見

嫻於勝算而明亮之勇畧並著國家又多一得力之人伊與奎林皆

孝賢皇后親姪不意如此出息甚為可喜又節據番人等供俱稱僧格桑為索諾木藥死埋在遜克爾宗之旁阿桂於攻克遜克爾宗時即應查訪明確創出賊尸割取首級文文綬於省城暫存俟擒獲逆裔檻送獻俘時一併解京獻馘

同日富勒渾奏言查川省自軍興以來所用糧石係滾運與運商並行其滾運之米照例各按遠近

地方每石每站折耗米一合至一合四五勺不等  
其商運之糧亦照滾運之例酌量遠近每石加耗  
米二三升不等但商米係交背夫直運送站交收  
非滾運逐站盤糧致多損折者可比是以糧員收  
到商米除添耗外不無稍有餘剩所有修理道路  
一切零星公用以及該員多帶人役口糧即於此  
項米內撥支向無報案亦無考核臣等查此項耗  
米原係各商自行加出以為各站添補斛面之資

商民意在急公顆粒皆關係民力詎可漫無稽考  
一聽各糧員任意開除致啓濫用浮銷之弊臣富  
勒渾現在大板昭因該站即係糧收高米之處隨  
飭大板昭糧員陳玉麟搏節辦理據實查報茲據  
報稱所收高米每石加耗米二升除添補折耗外  
尚可餘米一升共收高米二萬餘石現已存積二  
百餘石另行存貯聽候撥用等語臣等查收米各  
站雖有遠近多寡之殊但一站既係如此則別站

大畧相同應即以大板昭為準隨經通飭各站查明量收商米所收耗米若干均以一半添補虧折以一半繳出充公併將收過商米之站查明此項多餘米石是否現貯在倉如此支用即各照站米折銀數目完交歸入餘平項下備用既免開銷正項錢糧而收米之員併可免冒濫查追之累奏入

報

聞

同日

上諭軍機大臣曰兩金川平定後如噶拉依勒烏圍僧  
格宗美諾大板昭等處必須安設官兵其餘亦須一  
例布置營協相連方為一勞永逸之計其兵額或由  
四川內地改撥倘尚不敷即奏明酌派兵額亦無不  
可其如何設立鎮協參遊都守等官及各營兵丁額  
制總於辦理善後事宜時詳晰妥定至各番衆附隸  
恭順土司者亦當有所專屬意欲將成都副都統設

打箭爐如青海副都統之管理番衆仍令理藩院總  
統之朕意欲俟定金川後令各土司照仿回部伯克  
之例輪流入覲使其擴充知識得見天朝禮法著將  
此詳諭阿桂等留心酌辦

同日文綬奏言副將軍明亮現由宜喜進攻是前  
此備辦綽斯甲布糧運正可供用並准富勒渾鄂  
寶咨稱籌備一路夫糧均與臣所辦脗合惟是宜  
喜道險站長儲多積廩今驟增兵七千連官員跟

役幾及萬人此後軍食必須源源接濟臣又飭成  
都府屬再借碾社穀二萬石招商趕運以資軍食  
至南路協濟之米吉地等處現存一萬四千餘石  
查吉地離木池十站且據李本報稱因趕辦正地  
米雇有烏拉千餘就近趕運更為迅速加以打箭  
爐存米充裕足供轉輸是宜喜軍糧又得兩路協  
供無虞缺乏至綽斯甲布一路人夫由楸砮以外  
每站止減存二百名今宜喜既有增兵自須照舊



添設查前此以正地進兵南路添辦夫五千五百名現以桂林咨稱各站有應換班人夫即將新夫抵補以免往返又核計南路口外站夫較舊額再應酌減三千餘名一併於內地換班夫內扣除等語南路添辦人夫既可抵換班之用則各屬所辦人夫即可直解北路以資添設庶夫力雇價均無虛糜其改撥人夫未到之前業令各站就地短雇客夫接濟應用不致貽悞奏入報

聞

辛未富德奏言臣准將軍明亮約定七月初三至

初五等日進兵攻擊令臣亦酌量派兵以牽賊勢

臣即分撥侍衛章京帶領官兵分頭攻撲初三日

舒亮等領兵到卡卡角山溝內從河邊經過見林

箐內火光併聞林內有賊聲息即向火光處放鎗

射箭賊在林內抵拒直至黎明我兵奮勇衝殺殲

斃甚多賊不能支始敗回唐額特碉卡其劉輝祖

同時帶兵分為三隊先令二隊埋伏一隊直向賊  
碛放鎗誘敵賊人堅守不出惟在高峯上滾石放  
鎗直至天明其德赫布在河南面施放鎗砲攻擊  
賊碛一面先令侍衛興善保騎都尉和起拉等帶  
領官兵潛由菁林埋伏及至我兵攻奪時有四五  
十賊陡然衝出林內伏兵鎗箭齊發殺死七八人  
被傷甚多賊亦敗入碛卡死守臣思此次攻擊專  
為牽掣賊人不料賊已先覺預在林中埋伏竟思

斷我後路甚為可恨賴舒亮窺見火光先行勦殺  
得以痛殲賊人但我兵更換攻擊已一日二夜因  
於初五日半夜收兵嚴加防守奏入

上諭軍機大臣曰前鋒參領舒亮自至軍營屢經奮勉  
此次知有林內賊人聲息即先攻擊痛加殲勦更為  
奮勇出力昨朕已加恩賞給副都統職銜著再賞緞  
二疋以示鼓勵

同日富德又奏言初三日夜駐扎卡卡角把總李

中秀報稱昨日子刻有賊在卡倫前叫稱我等是布拉克底土兵係參贊大臣派往穆谷打仗今夜回來欲進卡倫飲水歇息求開放進去等語李中秀因黑夜難辨真偽答以不便開門賊即一齊吶喊向卡倫放鎗衝突幸我兵已有防備放鎗拒守而賊人又登西面高岡滾運大石擊損卡塙座垣有五十餘賊在兩旁擲石放鎗其餘衝入卡倫該弁率兵拒戰正在攪殺時第四卡倫把總焦光宗聞

聲來援內外攻擊斃賊十餘被傷者甚衆始行星  
散敗去李中秀得傷三處兵丁陣亡二人得傷四  
人其焦光宗左肘亦中刀傷一處臣即遣舒亮前  
往查驗李中秀焦光宗等傷痕屬實並看賊人踪  
跡係由綏庫營盤旁經過登木古山逃去等語李  
中秀督率官兵與賊鏖戰得至三傷猶能力守卡  
倫不為所奪而焦光宗一聞鄰營吶喊鳥鎗之聲  
率兵救援將賊擊敗亦至得傷更為奮勇是以將

皇上所給藍翎賞與焦光宗頂戴以示鼓勵奏入

上諭軍機大臣曰軍營接續安設卡倫特為互相應援  
况綏庫等離李中秀卡倫更不甚遠賊衆來時把總  
焦光宗已經率兵前救乃賊衆敗回時經過綏庫卡  
倫並未截殺以致逃遁綏庫係侍衛賞給巴圖魯名  
號之人理應感戴朕恩奮勉効力如此退縮甚屬非  
是綏庫即革去巴圖魯名號作為藍翎侍衛仍將賞  
銀一百兩追出分賞李中秀焦光宗等此後倘仍不

知悛改力圖奮勉即當據實參奏從重治罪

同日富德又奏言准桂林來咨調取總兵英泰辦

理後路臣查從前將軍明亮分路時於領隊大臣

侍衛官員內已將經練得力之人盡數帶往今明

亮起程後臣屢次乘機殺賊以掣其勢且查察卡

倫邏後路均關緊要總兵英泰雖年踰六旬甚為

經練且除管轄四川兵丁外其湖廣官兵亦令暫

時兼管而臣因番地生疎時與商辦實係營內得



力有用之人臣為公事起見將英泰留在軍營另將副將陳大復派往該員為人謹慎管理後路尚能勝任奏入

上諭軍機大臣曰富德處得力將領頗少朕亦早為念及英泰既係熟手仍留富德軍營幫辦一切因思哈清阿現在僧格宗一帶後路防守著即令哈清阿前赴納木覺爾宗同副將陳大復在彼加意防範

同日

上又諭軍機大臣曰昨據富勒渾等奏大板昭站糧員  
陳玉麟稟稱商米每石加耗約餘一升通飭量收商  
米各站員均以一半繳出充公並查從前收過商米  
如已無存亦令如數完交今思糧員責任綦重稍有  
遲悞缺少獲罪非輕此次各站糧員俱能黽勉辦公  
趲運無悞而所有耗餘米石據該督等稱凡修理橋  
道一切零星公用以及人役口糧皆於此內支發是  
所餘原屬無多第向無報案考核辦理本未妥協今

大板昭站員既經報出此後到站商米所有餘存之數令各站員一體開報尚屬可行至從前收過商米之處事皆已往若復紛紛查核未免瑣屑滋擾現在大功剋日告成各糧員等俱應在議叙之例正當令其互相鼓舞上緊供運以期指顧集勲豈可追咎從前責令賠繳致糧員等各懷疑懼恐反於軍務無裨况此次需撥解內外帑銀已三十九百餘萬豈必添此區區升斗而為之較及錙銖耶所有以前收過商

米之案俱無容查辦即此後商運解到餘米亦只令該站各按實存報若必照陳玉麟所報之數為準恐不肖人員因餘不足派累商人額外加增殊覺其不成事體該督等當實力稽查或糧員內有藉端作弊之人即嚴參重治其罪並通飭各糧員共知朕體恤微員之意俾其益加感奮

臣等謹案川省商運軍糧加耗除添補耗折外尚有贏餘支給公用前此未經開報無憑核實

茲督臣因大板昭站員報出請將從前各站收過餘米昭大板昭站員所報如數完交固屬意存核實慎重軍糧而逐站追查不無滋擾我

皇上俯念各站糧員黽勉趲運尚無貽誤軫其微勞免追既往且恐嗣後站員或因餘米不足派累商人祇令按實存報不必以大板昭為準

聖慈浩蕩體恤小臣委曲備至所以商官踴躍源源供運用克集勲於指顧也

甲戌阿桂豐昇額色布騰巴爾珠爾奏言查自七月初七日夜降大雪至初八日早間始漸停止是晚派海蘭察官達色分兵三路進攻該布達爾什諾之木城又派額森特下溝攻撲色溯普左邊山腿下木城碉卡以圖繞出賊後又派烏什哈達海祿等分為兩翼順梁直取色溯普正面大碉福康安等進攻色溯普右邊山腿上賊碉至色溯普靠北山腿係賊人來援之路亦派富興普爾普等列

兵而待以便截殺查額森特繞越之路頗遠定於  
初十日子丑時潛密前進海蘭察攻打之路較近  
定於是日黎明進攻兩處雖遙望可見而中隔深  
深一下一上有三十餘里恐信息不能迅速因飭  
知該領隊等遇雨即改期攻擊但該布達什諾木  
城在山巒突起之處路徑本為陡峭丑寅之交忽  
降陣雨膠泥滑溜更甚兵丁攀越進攻恐不能得  
利海蘭察於天色未明前乘賊不覺業已撤回而

額森特之兵因於丑刻前進下至溝底離賊木城  
已近難以撤回且乘此露雨之中或可攻賊不備  
隨於即刻督率官兵攀援上騰砍柵進攻正在鏖  
戰間有賊七八十名從靠北山腿前來救應經富  
興等督兵從上壓下普爾普亦帶兵循溝衝殺兩  
面夾攻復經我滿洲吉林索倫官兵衝入賊隊左  
右擊攻殺賊二十三名餘俱負傷敗竄維時官兵  
已將木城二座同時攻得復斃賊二十餘名惟木



城在山腿之下其上尚有賊碉難於據守當將木  
城折毀而回其烏什哈達海祿等聞額森特處鎗  
聲即督兵攻打正面大碉奮迅直前搭放木植板  
片騰過濠溝直抵碉根踴躍攀附而登者十餘人  
而碉頂堅固雖挖開孔隙拋放火聲并用刀矛向  
下攻戮頗有殺傷詎賊於溝沿地窖內及兩邊箐  
林中間放鎗其守碉之賊又復抵死放鎗拋石官  
兵難以久立遂拆毀其旁兩卡歸還原隊其福康

安等攻至午刻亦均撤回此次打仗藍領侍衛碩  
多爾海巴圖魯章京興奎協領賚里克俱帶鎗傷  
尚無妨礙查色朔普及該布達什諾兩處賊人攢  
集甚衆捨死守禦實屬不遺餘力但臣等熟察道  
路情形不出險不足以制勝現又跣定道路另圖  
統越以期必克

同日明亮舒常奏言臣等將達爾圖一帶山梁攻  
克後賊於東北頭敵四礮為捨死抵禦之計然察

看情形自達爾圖以北雖有複嶺重岡碉房寨落  
縱橫錯出皆係自上壓下在我已握建瓴之勢此  
時相去勒烏圍不過四十餘里憑高南望賊巢情  
狀皆在目中其東北山脊四碉即使賊人死據一  
隅而西南下拖山腿若行政克即不能阻我去路  
如此用力攻此四碉賊知滅亡在即困獸猶鬪勢  
所必然不值多傷士卒因即用礮轟推相機進取  
其西拖山腿奎林同富寧先於初四日乘勢搶奪

擄奪一碉賊復於當路緊要隘口向上挈卡初六日派三寶珠爾格德阿爾都帶兵前往佔據連築三卡現已壓至半山其下雖攔有賊卡如雁翅排開層層擁護然官兵據在上游施放鎗礮賊斷難久為支抵惟與格魯克古俄坡相連之木克什山梁其山兩面各斜插山腿互為環抱列築三碉其上皆足以撓我軍之後必須一併勦洗隨經綽斯甲布土兵於初八日先將其下迤西第一碉擄拈

初九日復將第二碉併力攻破截其水卡殺死賊  
番十餘名其第三碉高據木克什山脊現經奎林  
帶兵攻打因山後來路碉卡相接賊人易於策應  
攻之稍為費力現據所獲賊番彭楚克供稱頭人  
丹巴沃咱爾添調各寨落民親來救援亦止堪暫  
為抵拒而大勢既失賊情已先慌亂況阿桂在喇  
穆喇穆山梁與達爾圖隔河相望軍聲所振賊勢  
愈見披靡臣等惟有鼓勵軍心將木克什各碉掃

淨後路即發兵並進自可乘勝長驅與阿桂會合  
再臣舒常從前籌議如得要隘即於宜喜日旁兩  
營內酌撤一營歸併進攻茲已攻得達爾圖山梁  
正須多兵接應臣等現將日旁存兵抽調一千二  
百餘名前來應用仍留官兵五百名在該處屯駐  
足資防守均奏入

上諭軍機大臣曰此次海蘭察等因將軍預有號令遇  
雨即撤尚非退縮而額森特即於雨霧中帶兵攻得

木城甚為勇往蓋額森特見海蘭察屢次立功居多亦思奮勉自勵故不避雨凜將二木城立時攻打而富興普爾普等並皆盡力助勢烏什哈達亦聞聲攻得旁卡二座均係可嘉著阿桂將該將領等及出力之弁兵查明存記統俟攻得勒烏圍時咨部一併優叙至其得受鎗傷之侍衛碩多爾海章京興奎協領里克是否無恙深為軫念著遇便奏聞其傷亡官兵俱著查明咨部照例卹賞又同日明亮奏言南下拖

山腿要隘賊卡初六日派三寶珠爾格德阿爾都前  
往佔據連築二卡現已壓至山半其相連之木克什  
山梁兩面斜插山腿列碉其上皆足以撓我之後必  
須一併勦洗業已搶佔兩碉所辦亦好看來阿桂明  
亮兩軍隔河相望聲勢甚盛賊人氣餒自可迅速成功  
佇盼捷音至閱所獲賊目丹巴阿汰供詞據稱金川  
知官兵欲攻正地在樹林內要隘地方派人埋伏專  
等官兵進來下手等語是明亮前次不由正地進兵



幸不墮賊詭計尤為得算至彭楚克供丹巴沃咱爾  
開官兵已得達爾圖山梁即添調各寨落民親自帶  
領于各處防守等語丹巴沃咱爾是賊中之最狡惡  
者逆酋恃以領兵今伊既赴宜喜抗拒明亮等當留  
心防範勿稍疎懈若得生擒此賊較索諾木尤為可  
喜并令舒常知之

同日阿桂豐升額色布騰珠爾巴爾又奏言據五  
福稟稱同副將李天佑駕馭丹壩土舍頭人等派

土兵一百四十名又三雜谷土兵三十名於七月初六日潛搶穆爾津岡山腰戰礮土兵等直撲礮根礮內有賊四五名佔立礮頂往下放鎗擲石土兵破開礮門拋放火彈賊俱燒斃土兵等復進攻嶺上礮卡賊人抵死守禦鎗石甚緊比至天明恐賊抄集後路漸行撤回奏入報

聞

同日桂林劉秉恬奏言臣劉秉恬於十一日馳抵

章谷同臣桂林將北路夫糧細加籌酌因思將軍  
明亮現已攻克達爾圖山梁急據衆入情形又有  
不同必須就近多方協濟現據顏希深札稱西路  
新添人夫恐不能分撥各站已於南路站夫內撥  
調五六百名派佐雜二員就近押令長運木池臣  
等悉心籌計應將該處所需夫糧再為添撥臣劉  
秉恬即順赴吉地將未運米石沿途上緊督催併  
即督押人夫星赴明亮軍營俟該處米糧稍裕再

回楸砥辦事臣等商同臬司李世傑即將各處到站新夫抽撥一千名解往預備至明亮駐營北路一切官兵臺站需糧甚多吉地撥運之米雖有六千餘石尚不敷亦經商令該司飛飭打箭爐矣再撥米二千石從西路輓輸一時未能即到目下已可無憂缺乏再查宜喜等處兵糧腳價由西路運往較由南路稍省今西路既屬緩難濟急自應權宜辦理但此時協濟以後原派西路米石諒必源

源運至日就充盈是否尚須兩路兼供再行會商核辦其由丹東至木池向未設有糧站人夫行走均須自攜鍋帳口糧等物若令順背米石不惟所帶無幾轉使沿途稽滯或反滋生事端且人夫數至二千經由十餘站曠野蠻荒之地無知小民保無不畏懼潛逃未便僅委令佐雜等員致有貽悞茲並已商同李世傑酌派州縣二員隨臣劉秉恬管押前項人夫直赴木池似更足資彈壓而利遄

行奏入

上嘉之

乙亥文綬奏言查宜喜軍糧火藥上年運貯甚多業已飭令停解今年豐昇額移兵凱立葉又令將宜喜火藥運往供用至六月內開木池有轟藥之事恐軍火或有短缺即飭省局酌量撥解已共解宜喜火藥三萬六千餘觔並據藩司顏希深稟稱宜喜日旁覺木交共存火藥一萬八千餘觔加以

省城陸續解赴足可敷用此外尚有周叟存貯火藥五萬餘觔亦可就近撥用不致缺悞再臣接准將軍阿桂咨鑄造衢天礮現有滇銅足供鍊鑄再須辦解熟鐵備用並據藩司郝石請撥解熟鐵及工匠臣已飭成都縣知縣王啟焜檢選純淨熟鐵五千觔並選習鍊銅鐵工匠各十名解送軍營以咨鎔鑄奏入

上嘉之

欽定四庫全書

平定兩金川方略

志



平定兩金川方畧卷一百一